

**NATIONAL ASSEMBLY OF
SEYCHELLES**

Friday 14th November 2025

The Assembly met at 5pm

National Anthem

Moment of Reflection

Madam Speaker in the Chair

MADAM SPEAKER

Son Ekselans Dr Patrick
Herminie Prezidan Larepiblik
Sesel e *Première Dame*
Madanm Veronique Herminie,
Vis-Prezidan Larepiblik
Mr Sebastien Pillay,

Sef Ziz,

Prezidan Lakourdapel,

Deputy Speaker Lasanble

Nasyonal,

Leader Lopozisyon dan
Lasanble,

Leader Zafer
Gouvernman dan Lasanble,

Manm Lasanble
Nasyonal,

Minis Prensipal,

Tou Minis,

Manm Kor Diplomatik,

Envite Distenge,

E tou dimoun ki pe
regard nou e pe ekout nou lo
bann rezo medya, e sosyal.
Byenveni pour nou sesyon kot
nou resevwar Prezidan pour
son Ladres. San tarde, mon

ava demann Prezidan pou fer
son diskour.

**THE PRESIDENT PATRICK
HERMINIE**

Vis-Prezidan Larepiblik

Mr Sebastien Pillay,

Sef Ziz,

Prezidan Lakourdapel,

Deputy Speaker

Lasanble Nasyonal,

Leader Lopozisyon dan
Lasanble Nasyonal,

Leader Zafer

Gouvernman dan

Lasanble Nasyonal,

Bann Manm Lasanble
Nasyonal,

Minis Prensipal,

Tou Minis,

Manm Kor Diplomatik,

Envite Distenge,

bonzour.

Ozordi mon debout
devan zot koman Prezidan
Repiblik Sesel. Me mon osi
debout devan zot konman en
Ansyen Speaker Lasanble
Nasyonal.

En pozisyon ki mon'n
deservi pandan 10an avek
respe. En pozisyon ki mon
konpran son lenportans
fondamantal dan nou
demokrasi.

Ansanm ozordi, nou
konmans en nouvo sapit dan
listwar nou pei. En sapit ki
pou baze lo linite,
transparans, dinyite, osi byen
ki amelyor standar lavi nou
pep. Andotmo, en

transformasyon pou asir en meyer lavenir pour Sesel.

Mon konn byen e respe rol Lasanble Nasyonal dan gouvrenans nou pei. Son rol *oversight*, rann kont, transparans ek balans pouwar. Osi byen ki edik nou pep lo zot devwar sivik e zot dwa fondamantal.

Lasanble an premye lye i bezwen en legzanp pour nou pep, sirtou pour nou zanf an zenn.

Dan lespas 5an Lepep Seselwa in montre nou a 2 repriz ki zot swiv nou performans e nou konpetans de tre pros e ki roten Moris i finalman reste dan zot lanmen.

Fodre pa ki nou oublie konman politisyen ki Lepep ki siprenm. Mon oule profit sa lokazyon pou remersye zot tou pou aprouv tou bann nominasyon Ministeryel ki mon ti propoz avek zot.

Depi ki bann Minis ti sermante Zedi le 6 Novanm, mon'n ganny en Konsey Minis pou ed mwan enplimant program mon Gouvrenman.

Mon Gouvrenman pou asire ki Lasanble i ganny sa lespas finansyel e lenstitisyonnel ki i bezwen pou fer son travay byen e libreman.

O fet, plis ki 10an pase, mwan ek Madanm Clerk, ki ozordi i Madanm Speaker, nou ti travay lo en Lalwa apele *The*

Administration of Parliament Act, ki zisteman ti annan konman bi pou donn lotonomi finansyel e administratif Lasanble Nasyonal.

Ozordi, mon pe demann Madanm Speaker ek zot Lasanble Nasyonal pou anvoy sa *Bill* o pli vit posib kot mon lofis pou mon aprouve.

Anliny ek nou deklarasyon ki nou pou fer Lofis Speaker vin endepandan, nou pou byento table en amannman Konstitisyonnel pou rod sipor bipartisan pou ki anfen nou kapab ganny en Speaker ki pa afilye ek okenn parti politik, ouswa ki bezwen antre lo tiket en parti politik pou li kapab vin en Speaker. Koumsa i ava kapab fer son travay avek enparsyalite san okenn lenterferans.

Sa reform pou form parti en group amannman Konstitisyonnel ki mon Gouvrenman pou anmenn devan zot pou diskisyon e konsansis.

Konman parti sa reform, nou pou revwar formil reprezantasyon proporsyonnel pou sorti 10poursan pou vin 5poursan, pou donn bann pti parti en sans pou antre pli fasilman dan Lasanble Nasyonal.

Vi ki nou napa 2tyer dan Lasanble Nasyonal, nou pou rod lagreman bipartisan pou retir 10enm Lamannman

Konstitisyonnel ki donn larme pouvwar lapolis. Larme fodre zanmen i ganny servi kont sivilyen, eksepte dan lenstans en letan dirzans.

Mon fyer pou anonse ki sa fame Tim Ibou ki'n teroriz lazenes pandan 5 an, in finalman ganny fermen.

Mon pou osi rod sipor bipartisan pou aboli sa 30 zour tranzisyon apre ki rezilta eleksyon in anonse. Sa premye lesey pou fer li apre eleksyon 2025, in anmenn avek li tro bokou problem pour sa Nouvo Ladministrasyon.

Mon fyer pou osi anonse ki nou Kontra Sosyal avek Lepep Seselwa pour sa Premye 100 zour pa ti zis en slogan, me komikman nou parti.

Pandan sa trwa zour *Meeting Cabinet* ki nou'n annan sa semenn, apre konsiltasyon avek Minister Finans ek lezot Lazans Gouvernman, mon Gouvernman in pran sa bann mezir swivan :-

Nou pou reetabli *Seychelles News Agency* pou protez laliberte lekspresyon, e pou les lemonn konnen ki pe arive isi Sesel.

Nou pou byento table Lalwa pou kree en Lazans Lasante Mantal e reetabli APDAR konman en lazans pou adres problem drog ek lasante mantal.

Mon pa bezwen dir zot ki sa de problem i fer nou pei ase disfonksyonnel. E drog li menm sa lepidemi in vin en menas pour legzistans nou pei.

Nou lalit kont drog pou entansifye, pa zis pou redwir demann, me osi pou konbat trafiker. Tou dernyerman mon'n fer kler ki nou nouvo Polisi i "*search and destroy*". Savedir destriksyon bato ek son kargezon lo lanmer.

Sa pou anvoy en mesaz tre kler e for, ki nou pa pou toler okenn tranzaksyon kriminel dan nou lanmer e redwir risk ki drog ki antre dan pei apre ki in ganny sezi, i fini lo *ghetto*.

(APPLAUSE)

THE PRESIDENT PATRICK HERMINIE

Mon'n etabli plizyer komisyon lanket, e enn sa bann komisyon lanket pou etabli bann sironstans otour konstriksyon sa proze lotel lo *Assumption* dan en landrwa avek biosekirite tre sansib. Sa komisyon pou ganny dirize par Ansyen Sef Ziz, Madanm Mathilda Twomey.

Mon'n osi demann *Planning Authority* e Minister Lanvironnman pou imedyatman *issue* en *stop notice*, e sa in ganny fer yer.

(APPLAUSE)

THE PRESIDENT PATRICK HERMINIE

Lafors Defans Sesel in ganny met lo *standby* pou ranforsi sa *stop notice*, si bann devloper i refize respe sa *stop notice* parey zot ti fer an Me sa lannen.

Bann Komisyon pou osi ganny etabli pou fer lanket dan *Travizory*, leksplozyon CCCL, rayot dan prizon, parmi lezot ankor. Antretan mon pe demann *Travizory* pou imedyatman aret fer Seselwa rod lotorizasyon pou antre e sorti dan son prop pei.

(APPLAUSE)

THE PRESIDENT PATRICK HERMINIE

Lapolis in ganny demande pou reouver lanket dan lensidan deter lekor Takamaka, la ki nou'n idantifye 2 sipe.

Mon bann frer ek ser Seselwa, parey mon'n toutan dir zot, mon parti set en parti travayis e drwa travayer i pour nou sakre.

Enn bann pli gran lafors dan pei se nou bann travayer dan Servis Piblik. Gouvènmàn i anploy apepre 11mil dimoun dan sa sèkter. Mon Gouvènmàn i rekonnet zot sakrifis, zot devouman e zot kontribisyon pour fer en diferans dan lavi nou pep.

Depi 2021 plizyè benefis ki zot ti pe resevwar in ganny mete lo *standby*. Ozordi mon vin devan zot pou donn zot lespwar e pou rekonnet zot devouman, elev zot moral, e ankouraz en Servis Piblik ki baze lo merit, stabilite ek lazistis.

Travayer Sèkter Piblik, nou'n ekout zot, nou'n tann zot. E ozordi mon annan plezir pou anons sa bann mezir swivan:-

Long Service Allowance. Premyèman, apartir le 1 Desanm 2025, nou pou reentrodwir Long Servis Alawenns.

(APPLAUSE)

THE PRESIDENT PATRICK HERMINIE

Sa pou osi aplikab pour bann Lantrepriz Piblik. Sa mezir i montre ki mon Gouvènmàn i krwar dan zot e pe ankouraz zot pou reste dan Servis Piblik.

Mon lans en lapel sepandan avek tou travayer, pou kontinyen travay dir pou donn en pli bon servis nou pep; an prensip, letan ou annan plis leksperyans, ou sipoze pe demontre plis matirite e konnesans dan lafason ki ou delivre e mon pe kont lo zot pou prouv sa avek Lepep Seselwa.

Mon pran sa loportinite pou sipliy ek tou travayer

piblik pou aksepte swa sa pep pou met an plas en nouvo Gouvernman, e ki zot lwayote alors i dwatet anver sa Gouvernman.

Mon oule fer tou dimoun kler, e tou dimoun rapel ki mon Ladministrasyon pa pou toler okenn lesefer, pares, mank respe, mank disiplin e sabotaz.

Dezyenmman, tou travayer dan Servis Piblik pou resevwar en Trezyenm Mwan Saler plen an Zanvyé 2026.

(APPLAUSE)

THE PRESIDENT PATRICK HERMINIE

E sa i osi aplikab pour bann travayer dan bann Lantrepriz Piblik ki abitye ganny li dan lannen aktyel. Sa Trezyenm Mwan Saler, pou ganny peye 100poursan san okenn kondisyon performans e san taks. Les mon elabore;

Nou parti i mentenir ki Trezyenm Mwan Saler i en drwa travayer, aköz pandan tro bokou letan travayer in travay 2,3 zour ekstra, eksepte an Fevriye, pour nanryen.

Pour nou konman en parti avangard e progresis, sa i pirman eksplwatasyon travayer. Ler nou azout tou sa bann zour ansanm i fer egzakteman en 13enm mwan. Pou ki sa pa vin en fardo lo ledò bann pti biznes, mon

Gouvernman pou met de kote R5milyon pou soutenir zot. Nou anvi ki sak travayer i santi li apresye san lafreder, san konfizyon.

Nou pe osi fer li kler ; en sistenm performans dan Servis Piblik pou kontinyen. I en zouti enportan pou mezir travay endividyel, asire ki lobzektif lorganizasyon i ganny realize, pou donn bonous si i posib e pou servi pou promosyon e devlopman karyer. Me non pa konman en baz pour pey Trezyenm Mwan Saler.

Ki Trezyenm Mwan Saler i en bonous ki bezwen ganny *appraised* i en konsepsyon *néolibéral* kapitalis ki mon Gouvernman i rezete.

Mon Gouvernman pou kontinyen respekte son obligasyon, pou pey Trezyenm Mwan Saler travayer *IOT*, parey ti ganny pratike dan lepassé avan 2020.

Lamannman nesese dan Lalwa e dan Lalwa Lanplwa ki pou fer sa posib pou ganny propoze devan Lasanble Nasyonal tre byento.

Bann travayer ki lo Kontra me ki'n aret ganny gratwite pou osi sa lannen ganny Trezyenm Mwan Saler. E apre sa i ava arete ler gratwite i ganny reetabli.

(APPLAUSE)

THE PRESIDENT PATRICK HERMINIE

Pour plizyer lannen, gratwite pou bann travayer ki lo Servis Kontinyel pa'n ganny revize. Apartir Zanbye 2026 peyman gratwite pou konm swivan;

Bann travayer ki'n fer 5 an servis pou vwar zot gratwite sorti R10,000 pour ariv R20,000.

Bann ki'n fer 10an servis pou ogmante sorti R10,000 pour ariv R25,000.

Bann ki'n fer 15an servis pou ogmante sorti R10,000 pour ariv R30,000.

Bann ki'n fer 20an servis pou ogmante sorti R15,000 pour ariv R35,000.

Bann ki'n fer 25an servis pou ogmante sorti R20,000 pour ariv R40,000.

Bann ki'n fer 30an servis pou ogmante sorti R25,000 pour ariv R45,000.

Bann ki'n fer 35an servis pou ogmante sorti R25,000 pour ariv R50,000.

E bann ki'n fer 45an servis pou ogmante sorti R30,000 pour ariv R60,000.

Bann travayer ki zot peyman gratwite i lo bann *scheme* spesyal, tel ki bann ansenyan, ners, bann travayer ki lo Kontra Sektor Piblik, en legzersis i deza an mars.

E bann revizyon nesesser pou ganny anonse pandan Prezantasyon Bidze 2026.

Mon Gouvernman pe entrodwir en *one-off allowance* pour tou bann etidyan Sant Profesyonnel ki pe vin etidye lo Mahe sorti Praslin ek La Digue avek en sonm R2000.

Sa sonm pou ed sa etidyan avek bann kou deplasman e ed li pou etabli li lo Mahe. Sa sonm i pour tou etidyan ki pou konmans zot letid apartir lannen 2026.

Nou pou osi reentrodwir *Unemployment Relief Scheme* apartir Zanbye 2026. Dapre dernyen statistik pibliye par Biro Nasyonal Statistik pour dezyenm kar an 2025, to somaz parmi nou bann zenn aze 15 a 24 an i 9poursan.

Alors anba URS, nou lobzektif prensipal se pou get sak endividi e aprann plis lo zot sityasyon aktyel. E depandan lo zot bezwen, nou pou pli byen plase pou rod lanplwa pour zot.

Sa bann zenn ou lezot endividi ki pou ganny anrezistre anba URS, pou ganny ofer pli bon konsey lo ki mannyer pou servi pou ganny en lanplwa.

Anba URS sa bann endividi pour resevwar en alawenns par mwan. URS pou konplimant bann Program *Re-skilling* e devlopman konpetans ki ganny fer par Departman Lanplwa.

Departman Soulazman Lapovrete, pandan 5an ki

mon'n vizit bann fanmir dan lakominote, mon realize ki bokou fanmir Seselwa ankor pe ganny difikilte pou fer de bout zwenn, e pe viv dan bann lakaz delapide.

Gouvernman pou reetabli Departman Soulazman Lapovrete. Gouvernman pou ogmant Bidze Program Reparasyon Lakaz sorti 10milyon pou vin R20milyon dan Bidze 2026. E sa *Scheme* pou ganny zere par Departman Lapovrete.

(APPLAUSE)

THE PRESIDENT PATRICK HERMINIE

E Gouvernman pou entrodwir en *living wage*, pou soulaz bann fanmir pli vilnerab. Plis detay lo sa pou ganny donner dan Diskour Bidze.

Parey nou ti anonse, apartir le 1 Zanvye 2026, Gouvernman pou aboli sa R25 Taks Soutenab Lanvironnman (*Environmental Sustainability Levy*) lo bann viziter pour bann pti Letablisman Touristik, anfen ki Sesel a vin en destinasyon pli abordab pour bann viziter. E osi -

(APPLAUSE)

THE PRESIDENT PATRICK HERMINIE

E osi ede relev nou Lendistri Tourizm. Anliny avek

Manifesto United Seychelles, a parti le 1er Zanvye 2026, laz retret pou desann sorti 65an pou ariv 63an.

(APPLAUSE)

THE PRESIDENT PATRICK HERMINIE

Sa i pou fer ki laz ki nou sitwayen i kalifye pou ganny benefis retret anba Fon Sekirite Sosyal pou osi desann pou ariv 63an.

Nou ava rapel ki nou'n fer langazman pou fer benefis retret anba Fon Sekirite Sosyal ariv R10mil par mwan pli tar 2029. Nou pou deza konmans sa logmantasyon a parti le 1 Zanvye 2026, ler nou pou ogmant sa benefis par R800 par mwan pour zot tou ki lo Sekirite Sosyal.

(APPLAUSE)

THE PRESIDENT PATRICK HERMINIE

Laz pou kalifye pou peyman pansyon retret an antye anba Fon Pansyon pou reste pour lemoman 65 an, an mezir ki nou pe analiz bann opsyon lenvestisman e kontribisyon ki neser pou fer sa fon reste finansyerman soutenab. E nou panse ki nou pou dan en pozisyon pou redwir sa laz osi tre byento.

Mon Gouvernman i reste angaze pou fer desann pri lavi.

Konman parti sa legzersis nou pou revwar *STC* dan son totalite, pour ki i a zwe zot rol kit pri komodite de baz abordab pour bann ki pli vilnerab dan nou sosyete.

Nou pou napa swa me fer en lanket dan sa nouvo *Cold Store* *STC* ki parey nou konnen son pri konstriksyon in double sa ki ti'n ganny bidzete.

Ozordi i annan bokou kestyon lo son fonksyonman. 3 semenn pase pros 3 *container* zoranz ti bezwen ganny zete aköz problem tanperatir dan sa *cold store*. E avantyer 72-ton zonnyon, en lavalè R600mil ti ganny detrir aköz i ti'n pouri dan sa *cold store*.

Mon osi annan gran plezir pou anonse ki apre plizyer diskisyon, Gouvènmàn pou kapab aste sa 22poursan *shares* dan *Nouvobanq*.

(APPLAUSE)

THE PRESIDENT PATRICK HERMINIE

Sa larzan pou evantyeleman ganny servi pou soutenir nou Fon Pansyon. Parey nou ti'n promet zot, nou pou anmenn en lager asarnen kont koripsyon e sa pratik ek nou pa ek nou.

Nou pou anmenn tre byento devan Lasanble en Lalwa lo Deklarasyon bann

Byen ki pou fer li obligatwar pour tou politisyen, zot madanm ek zot zanfan, pou osi zot deklar zot byen.

Nou pou kriminaliz ek nou pa ek nou atraver en nouvo Lalwa apele *Fair Administrative Act*. Sa Lalwa pou byento vin devan Lasanble.

Nou vizyon i kler. Nou anvi en Sesel ki travay pour tou dimoun, pa zis pour en bann, *for the many not the few*. En Sesel kot prosperite i ganny partaze, lazistis i reel, e kot *leadership* i ekoute, e kot Seselwa i santi zot valorize.

Nou pou gouvèrn avek liminite, avek kouraz, e avek determinasyon. Nou pou servi lepep e non pa zis diriz lepep. E nou pa pou zanmen bliye ki vre pouvwar i touzour reste dan lanmen lepep.

Ozordi mon demann ek Seselwa pour nou leve, nou pe regrese koman en pei. Moris o bor nou in kit nou deryer. E ozordi nou pa ni menm parmi sa premye 10 pei lo latib dan Lafrik lo latib pouvwar *d'achat*.

IMF i dir nou ki nou lekonomi i pli for, me nou lepep nou vin pli mizer. Yer *Cap Verde* ti ganny konseye par *WHO* pou vin Sesel pou aprann ki mannyer pou fer *primary health care*. Ozordi nou, nou bezwen al *Rwanda*

pou nou aprann sa. Sa i en laont.

Nou pei dezormen i ankor tre divize, e linite i primordyal. San linite, zanmen nou pou progrese. Pour bann ki annan finalite avek *TRNUC* - pour ki i annan finalite avek *TRNUC*, mon'n etabli en Komite Linite ki pou ganny dirize par Ansyen Prezidan Danny Faure.

Sa komite pou zwenn ek Komite Viktim pou diskrit lenplimantasyon bann rekomandasyon *TRNUC*.

Sa semenn mon'n osi ekri Mr Ralph Hoareau, frer defen Gerard Hoareau, pour nou tonm dakor lo plas son frer dan listwar Sesel. Mon konnen ki sa ki mon pe propoze i tre sansib dan nou popilasyon ki politikman tre polarize.

Be nou bezwen vwar sa kouraz dan fon nou leker pou pardonnen e oublie. Mon repete ki se selman dan linite ki nou kapab progrese.

Alors, annou leve ansanm. Annou konstrir ansanm. Annou servi ansanm. Nou bezwen fer li pour Sesel. Nou bezwen fer li aköz Sesel i pour Seselwa. Ki Bondye i beni nou pei. Mersi bokou.

*(Standing ovation by
US Members)*

Mersi Mr Prezidan. E alor ki nou ariv a lafen nou sesyon, mon annan plezir pou mwan envit tou dimoun pour en resepsyon dan *lobby*. Se alor ki Lasanble i *adjourn* ziska son lot *sitting*.

(ADJOURNMENT)

MADAM SPEAKER